



GRAAIE



100 Joor Sans Gène
Fyrr und Flamme
100 Joor Rösli
28. Maie 2022

E Jubilarin gratuliert dr Jubilarin:

100 Joor Sans Gène • 100 Joor Rösli

An dr Mediekonferänz vom 22. Abrille 22 ha n y de Medie-schaffende scho mit Stolz verkündet, ass mer none Zytzüggin by n is hänn, wo glych alt isch wie d Sans Gène. Me het nit schlächt gschtuunt!

Ze dääre lange «Fraue-Gschicht» in unserer Glygge, wo n im Archiv jo allewyl wiider e Platz yygnoo hett, hett s Rösli nadürlig einiges uss ihrer Zyt as Pfyffere könne verzelle.

Händsche n und Herreschueh,

daas sinn zwei ganz wichtigi Detail für d Fraue n an dr Fasnacht gsi, ass me joo nit gsee hett, ass es ebbe Fraue sinn.

Telebasel hett sich sehr für das Ereignis interessiert und noo zwei Schtund Archivfierig im Sans-Gène-Käller denn ganz schüch gfroggt, eb sy am Geburtsdaag vom Rösli au dörfe ko filme. Y ha nit lang überleggt, sondern sofort jo gseit - e n Eer für s Rösli und au e n Eer für d Sans Gène.

E baar Daag vor dämm dänggwürdige 28. Maie hett mer Telebasel nonemool aaglütte n und noogfrot, eb si definitiv an sällem Samschtig dörfe ko filme. Nadürlig - und si sinn denn au ko. D Moderatorin, d Julia Schwamborn, isch näbe mer gschtande, wo mer s Rösli en Anekdote vom Morge verzellt hett.

Wie n e n alte n Aff

«Do hett mi eini n Aff in s Zimmer gschoobe, hett mi dinn sitze loo und nüt me mit mir gmacht - y bi dört gsässe, wie n e n alte n Aff». Mer hänn beidi glache und y ha denn dr Julia erklärt, ass daas ebbe s Rösli isch. S hett denn no gmeint: «Die solle numme wüsse, wie n y bi.»

Ass nadürlig s Rösli dr Regierigrötene Tanja Soland am Morge klar gseit hett, ass dr Höhepunggt denn am Noomidaag stattfindet, isch jo ganz digg (dr Regierigsbsuech isch es also nit gsi...): «Denn kunnt nämml d Sans Gène und spiilt hoffentlig d Sans Gène und dr Wettstaimarsch».

Dr Wunsch wird erfüllt

Genau eso isch s gsi, mer sinn koo und hänn dä Wunsch seer gärn erfüllt: Mit em gmainsame Ständeli vom Stamm und dr Alte Garde, mit de Sans Gène und em Wettstaimarsch! *Patricia*



Härzligi Gratulazion

Die ainte haisse «ohni Hemmige» und s Rösli hett keini Hemmige.

Au mit 100 Joor no immer e spitzi Zunge, e richtigi Sans-Génelere, nämml ungezwunge.

In de 1940er Joor bisch Du as Pfyffere zue n is koo s Sans-Gène-Fieber hett Di paggt und bis hüt nümm lo goo.

Dy Woonigsdüre ziert nit eifach e Namensgläüber, dört hängt e Gmäd «Madame Sans Gène - Rösli Weber».

Nääbe dr Glygge hett s Härz au no für öbbis anders gschlaage: Vier Reeder und e Motor, zum s genau z sage.

Über 70 Auti hett s Rösli bsässe, numme «Rächti» - alles anderi kasch vergässe!

Vier Reeder sinn s hüt immer no, dr Motor allerdings ewägg, dasch dr hütting obligatorisch Noohaltigkeitseffäggt.

Mer dangge Dir vo Härze für Di Treui ze unserer Glygge und sinn unglaublig stolz, ass Du by n is bisch.

Härzliggi Gratulazion und e wunderschöne Daag!

